

Regional News Unit AIR Aizawl
Monday, April 29, 2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

- Assam Rifles-te'n May ni 1 atanga Mizoram leh Myanmar ramri khar a nih tur thu an sawi a, Mizoram sorkar chuan thu a la dawng ve lo.
- Ruihhlo lo lut hluar zel leh pawikhawihna ah Myanmar mi engemawzat an inhnawih.
- Election Commission chuan Lok Sabha inthlan thawh 6-na tur hriattirna a tichhuak leh ta.
- Indian Coast Guard-ten Pakistan lawng atangin cheng Vbch 600 hu ruihhlo kg 86 an man.



BORDER CLOSURE

Assam Rifles-te'n May ni 1 atanga Mizoram leh Myanmar ramri khar a nih tur thu an sawi lai-in Mizoram sorkar chuan hemi chungchang hi engmah a la dawng ve lo.

Home Commissioner Pu H. Lalengmawia'n Akashvani Aizawl a hrilh danin Ministry of Home Affairs atangin May ni 1 atanga km 404 a thui Mizoram leh Myanmar ramri khar a nih tawh dawn thu hi engmah an la dawng lova. An dawn loh avangin engmah official-a hriat an neih loh thu a sawi. Hetih lai hian Thawhlethni (April ni 23) khan Assam Rifles hotute hian Assam Rifles Camp, Darthlalang Tlang, Champhai-ah ramri hnaih khua Tlangsam, Zote, Ngur, Ruantlang leh Hmunhmeltha khawtlang hruaitute bakah YMA Sub Headquarters Champhai leh Champhai South Jt. VC leh Champhai North Jt. VC hruaitute kokhawmin an hmalak dan hrang hrang an hrilh a. Ministry of Home Affairs atanga thu an hmuh anga MP inthlan vuakveta ramri khar a nih hnua ramri khar a nih chhunzawm dan tur sawiin, April thla chung chu ngaihnamna kalpui a ni ang a, ram pahnih mite darkar 72 (ni 3) chhung an la cham thei dawn a. Eng emaw harsatna avanga hun bi tuk chhung aia rei chamturte chuan duty-te phalna lak hmaksak tur a ni tih leh, phalna la lote chungah erawh chuan action lak a ni thung dawn tih an sawi.

Assam Rifles hotute chuan Ministry of Home Affairs atanga thu an dawn angin May ni 1 atang chuan Champhai District chhunga Border Haat awmte chu khar a ni dawn tih sawiin, harsatna lian bikah erawh chuan chhinchhiahna fel tak nen inkal pawh theih a ni dawn niin an sawi baw. Ramri khar chhan tur hi Champhai District chhung atanga ruihhlo tawlh nasa lutuk leh Myanmar mi leh sa-in Mizoram kal tlanga ruihhlo an tawlh nasa lutuk dan chahna tur niin an sawi a ni.



MYANMAR REFUGEES

Ruihhlo lo lut hluar zel leh pawikhawihna a Myanmar mite an inhnamhnawih leh thin avangin Myanmar raltlan 34,282 awm mekte an chep zel.

Myanmar raltlan 34,282 zinga mi 15,938 te hi relief camp hrang hrang 147-ah an awm mek a. Mi 18,344 te erawh chuan an chhungte leh thiante an belh bakah engemawzat chu mi in luaha khawsa te, an hnathawhna hmuna awm chilhte an ni a. Tun dinhmunah raltlante hi mi 10,899 chu hmeichhia an ni a, mipa 10,073 leh naupang 13,310 an awm bawk. Khawzawl, Kolasib, Saitual leh Serchhip district-ah te relief camp sak a ni lova, district dang 7-ah chuan relief camp a awm vek a ni. Siaha district chu relief camp tamna ber a ni na a; mi 3,888 chauh an awm a, a dawttu Lawngtlai district-a relief camp 36-ah mi 3,519 an awm. Champhai district, relief camp 23 awmnaah, mi 6,346 zet an awm thung a. Champhai district-ah hian Myanmar raltlan an awm tam ber a, an vaiin mi 14,499 an awm a. Siaha district-in dawtin mi 6,044 an awm a, mi 5,864 awmna Lawngtlai district-in a dawt leh a ni. Zokhawthar relief camp-ah raltlan an awm tam ber a, mi 3,290 zet an awm a, Farkawn khua-a relief camp-ah mi 1,426 an awm bawk.

Tun hnai khan Central YMA leh MZP Champhai district headquarters chuan thuchhuah siamin raltlante tihtur leh tih loh tur an ziak chhuak a. Ruihhlo hmanga sumdawna a inhnamhnawih lo tur leh ruihhlo do kawnga sorkar leh khawtlang tanpui zawk tura ngenna bakah India ram dan leh khawtlang inkaihhruaina zawm tura ngenna an tichhuak a. India khua-leh-tui chauhvin an neih theih voter ID, aadhaar card, driving licence leh a dangte siam lo turin an hriattir bawk a. Mi in leh dawr luah lai luah man tam zawk hmanga luahlan lo turin an hriattir bawk a ni.



METH SEIZURE

Inrinni zan dar kaw rik hma deuh khan Mizoram Police Special Narcotics Police Station leh Assam Rifles tangruah chuan Aizawl Salem vengah Methamphetamine kg 1 leh gram 908 an man.

Police hotute hnen atanga thudawn danin Methamphetamine neitu Hrangchhuankima (21) Thinghlon khua, Mamit District, tuna Salem Veng Khuangchera section a awm mek chu an man a. Ruihhlo man hi cheng nuai 24 leh sing 8 hu ni a chhut a nih thu Police hotute chuan an sawi a. Hrangchhuankima hi Narcotic Drugs and Psychotropic Substances Act, 1985 section 22(C) hmanga thubuai siamsak a ni.



DISASTER

Inrinni tuk khawvar hma zing dar hnih bawr vea ruah leh rial thawk khan Khawzawl District chhunga khaw pahnih - Tualpui leh Vankal ah te chenna in chung engemawzat a deng chhia.

Tualpui khuaah hian in 24 vel leh Vankalah in 27 vela rial hian a deng chhia nia hriat a ni. He chhiatna thleng hi a hriat velah Khawzawl Bawrhsap Pu K. Lalrohlua chuan chhiat tawk te chhawmdawl dan tur a ngaihtuah nghal a. Inrinni vek khan Tualpui khuaah Pu Elijah LH Sanga, SDC chu tir nghalin chhiat tawk te chhawmdawl lailawk (immediate relief) atan Silpauline sem chhuah nghal a ni a.

Nimin tuk khan chhiat tawk te tanpui tur hian Vankal an pan leh a, chhiat tawkte hnenah Silpauline an pe leh nghal bawk a ni. Tualpui leh Vankal khuaa chenna in chung chhia tam tak hi Village Level Disaster Management Committee kaihhraina a thawmthat nghal a ni.

Pu K. Lalrohlua chuan Rial tlain in chung a tih chhiat te hi verification report milin State Disaster Response Fund (SDRF) atangin tunkarah tanpuina pek nghal tum a nih thu a sawi a. Tanpuina pawisa hi Village Level Disaster Management Committee te Bank Account-ah dah luh a ni dawn tih a tarlang.

Heti hian April ni 20 atanga tun thlenga rial tla, ruah sur leh thlipui tlehin Mizoram hmar chan lama in a tih chhiat tawh zat hi 650 chuang a tling tawh a, report hi dawn mek zel a ni. Nilaini tlai lam khan Vanbawng, Sunhluchhip leh Khawlian khua a in tam tak chu rialin a deng chhia a. Vanbawng khua-ah hian in 54 a deng chhia a, Sunhluchhip khua-ah hian in 56 deng chhia-in hemi zinga in 15 chu luah zui tlak loh khawpin a chhia a ni. Khawlian-ah hian in 25 a deng chhe bawk a, in chhia zinga 7 chu luah zui tlak loh khawpa chhia a ni.

A hma April ni 20, ni 21 tlai lam leh Thawhtanni, ni 22 zing lama thli tleh leh rial tla khan Mizoram hmar lama in 456 aia tlem lo a ti chhe tawh bawk a. Thli tleh, ruah sur leh rial tla hian Aizawl, Kolasib, Champhai leh Khawzawl district-ah te chhiatna a thlen a ni.

Sorkar chuan chhiatna thlenna district bawrhshapte'n chhiatna thlen thulha an lo hman tur silpaulin a lo pek sa hmangin ruah sur thli tleh leh rial tla tuartute tanpuina a theih ang angin a pe chhuak nghal zel a. A tul dan angin rangva pawh pek chhuah mek zel a nih bakah State Disaster Response Fund (SDRF) sum hmanga pawisa fai a tanpui tura ruahmanna siam a ni a. A daih lohna chu sorkar laipui-ah dil belh tum mek a nih thu Disaster Management and Rehabilitation department hotute chuan an sawi a ni.



NOTIFICATION FOR 6TH PHASE OF LOK SABHA ELECTIONS HAS ISSUED

Election Commission chuan Lok Sabha inthlan thawh 6-na tur hriattirna a tichhuak leh ta.

Lok Sabha inthlan thawh 6-naah hian State 6 leh UT 1 huam chhunga Parliament bial 57 atan thla thar May ni 25-ah vote thlak a ni dawn a. Chuh tumte tana hming thehluh hun hnukung ber chu May ni 6 a ni ang.

Lok Sabha inthlan thawh 6-na hi Delhi-a seat awm zawng zawng seat 7, Haryana-a seat awm zawng zawng seat 10, Uttar Pradesh-a seat 14, Bihar leh West Bengal-a seat 8 ve ve, Odisha-a seat 6 leh Jharkhand-a seat 4 atan buatsaih a ni dawn a. Vote thlate chu a dang rualin June ni 4-ah chhiar a ni ang.



HIGH VOLTAGE CAMPAIGNING FOR LOK SABHA POLLS

Lok Sabha inthlan campaign boruak a sang tawh hle a. Political party hrang hrang hruaitute chu an candidate-te tan ngawrh takin an campaign mek a ni.

Prime Minister, BJP hruaitu hlun Narendra Modi-a chuan nimin khan Karnataka-a vanthlang inkhawmah thu a sawi a. India ram thil titheia siam, hmun hima siam leh hmasawna a tiam a. Kum 10 kalta chung khan a sawrkar chuan loneitu tenaute pawh FPO kaltlanga a tanpui thu a sawi a. Ram chhungah rel kawng leh lamliante nasa taka tihpun a nih thu a sawi.

Congress hruaitu hlun Rahul Gandhi-a pawhin nimin khan Odisha-a vantlang inkhawmah thu a sawi a. Congress thlan tlin an nih chuan thalai hna neilote tana hna an neihna tur 'Pehli Naukri Pakki' Scheme chhawpchuah a tiam a ni.

<><><>

EC ASKS AAM AADMI PARTY TO MODIFY ITS LOK SABHA POLL CAMPAIGN SONG AS PER ADVERTISING CODES

Election Commission chuan Aam Aadmi Party chu an inthlan campaign hla, video fakna an siam chu Fakna siam dan leh ECI khaihruaina zulzuia tidanglam leh tur leh, thehlut tha leh turin a hriattir.

Election Commission chuan AAP campaign video-a tawngkam hman leh mipuiin Jail bang phena Delhi Chief Minister Arvind Kejriwal-a thlak an keng chu a duh lo a. ECI kaihruaina leh Fakna dan leh hrai a kalh a ni an ti.

Hetihlahian AAP chuan tun tum hi Election Commission-in political party-te campaign hla an hnawl vawi 1-na a ni an ti a. AAP hruaitu Atishi chuan an campaign hla chu a taka thil thleng ngei behchhana siam a ni a, Model Code of Conduct a kalh lo tiin Chanchinbumite hmaah a sawi a ni.

<><><>

INDIAN COAST GUARD ARRESTS 14 PAKISTANIS WITH 86 KG DRUGS WORTH RS 600 CR AT PORBANDAR COAST

Indian Coast Guard-te chuan nimin Pathianni khan Gujarat-a Porbandar vaukamah Pakistan lawng atangin cheng Vbch 600 hu ruihlo kg 86 an man a. Ruihlo neitua puh, lawnga chuang mi 14 man an ni bawk.

Sawrkar thuchhuakin a sawi danin, Indian Coast Guard-te hian Gujarat Anti-terrorism Squad (ATS) leh Narcotics Control Bureau (NCB)-te nen tangkawpin Arabian tuipuah zankhuain ruihlo tawlhruk dap beihpui hi an thlak a. Pakistan lawng leh a michuangte chu man an ni ta a. Porbandar-ah chhui zui atan lak an ni.

Tun hi kum 3 kalta chhunga Indian Coast Guard-ten hlawhtling taka beihpui an thlak vawi 11-na a ni.

<><><>